

Pagpangitag Pagpabuhi

ADLAW 5 — ESPIRITOHANON O UNODNON: UNSAY KALAHIAN?

“Apan kita nanagpakaambit sa panghunahuna ni Cristo” (1 Corinto 2:16).

Atong Dugtong sa Langit

Sa dili pa hubaron ang espiritohanon ug unodnon nga mga Cristohanon, kita kinahanglan maghinumdum nga kita wala nagahisgot sa “mga makasasala” ug “mga dili makasasala.” Tanang katawhan, ang duroha espiritohanon ug unodnon, maoy mga makasasala nga nanginahanglan og usa ka Manluluwas. Ang butong nato nga pagkamatarung nagagikan kaniya. Hinuon, ang panukdanan alang sa paglakip diha sa usa ka pundok o sa lain mao ang atong personal nga relasyon sa Balaang Espiritu. Ang Dios nagbungat nga dili kita makaputol sa atong relasyon sa Balaang Espiritu nga dili madaot ang atong kadugtongan sa langit (Mateo 12:32). Si Ellen White nagasaysay, “siya nga nagasalikway sa buhat sa Balaang Espiritu nagabutang sa iyang kaugalingon diin ang paghinulsol ug pagtoo dili makaabot kaniya. Kini pinaagi sa Espiritu nga ang Dios nagalihok sa kasingkasing” (*The Desire of Ages*, p. 322).

Ug kini angayan balikbalikon: ang bugtong tawo nga kinahanglan akong pagasukdon ingon nga espiritohanon o unodnon mao ang akong kaugalingon. Ang Dios makabuhat diha sa ubang mga kasingkasing ug wala nanginahanglan kanako sa pagpangpatik sa mga isigka-sakop sa iglesia. Ang maayong balita mao nga kon ako masagmuyo kon unsay Iyang ginapadayag sa akong kasingkasing, Siya makausab kanako gunad karon!

Ang Espiritohanon nga Sakop sa Iglesia

Ang espiritohanong tawo maoy sa matuod usa ka nakabig nga Cristohanon. Bisan natawo nga usa ka makasasala, siya gitawag nga “espiritohanon” tungod siya adunay usa ka buhi ug nagatubo nga relasyon sa Balaang Espiritu. Ang Apostol Pablo nagasulat, “Ang tawong espirituhanon magatugkad sa tanang mga butang, apan siya dili pagatugkaron ni bisan kinsa. “Kay kinsa bang tawhana ang nakasabut sa hunahuna sa Ginoo, aron ang Ginoo iyang katudloan?” Apan kita nanagpakaambit sa panghunahuna [Espiritu] ni Cristo.” (1 Corinthians 2:15, 16).

Si Jesus mao ang sentro sa kinabuhi sa espiritohanon nga tawo ug nagahari diha sa iyang kasingkasing ug nagatino sa iyang mga prayoridad. Ang espiritohanon nga tawo nanumpa sa iyang kaugalingon sa hingpit ngadto kang Jesus ug nangayo nga mapinadayonon alang sa Balaang Espiritu (Lucas 11:13). Sa konteksto sa Laodicea, and espiritohanon nga tawo mahimong tawgon nga “init” (Pinadayag 3:15). Sa sambingay sa 10 ka mga olayng babaye, siya mahimong tawgon nga “maalam” (Mateo 25:2-4). Ang espiritohanon nga tawo nagasinati sa kinabuhi nga “mas madagayaon” (Juan 10:10) ug napuno sa “tanang katibuokan sa Dios” (Efeso 3:19). Siya nagamaya nga siya “naluwat pinaagi sa pagtoo” (Efeso 2:8). Bisan ang espiritohanon nga tawo nagaatubang og mga kapakyasan ug tentasyon, siya nagatutok kang Jesus.

Ang Unodnon nga Sakop sa Iglesia

Ang usa ka unodnon nga tawo tingali may usa ka pakaaron-ingnon o nabahin nga relasyon sa Dios. Tingali siya wala ra kaayoy pagtagad sa Balaang Espiritu o tingali may dayag nga pagkamasupilon. Mao kini ang giingon ni apostol Pablo: “Apan ako, mga igsoon, dili makahimo sa pagsulti kaninyo ingon sa paagi sa pagsulti ko ngadto sa mga tawo nga espirituhanon, kondili sa mga tawong kalibutanon, sa mga masusu pa diha kang Cristo. Gibuhi ko kamog gatas, dili sa magahi nga kalan-on; kay kamo dili pa andam niini; ug bisan gani karon, kamo dili pa man andam, sanglit kamo kalibutanon pa man gihapon. Kay samtang anaa pa kaninyo ang kasina ug ang panaglalalay, dili ba kalibutanon kamo ug nanaggawi ingon nga mga tawo nga lawasnon? Kay sa diha nga ang

usa magaingon, "Ako iya ni Pablo," ug ang usa, "Ako iya ni Apolos," dili ba kamo igo lang nagagawi ingon nga mga lawasnon? " (1 Corinthians 3:1-4).

Dinhi kita nagahukom nga ang ilhanan kinahanglan mao ang atong relasyon sa Balaang Espiritu. Ang *unodnon* nagahulagway sa usa ka tawo nga nagapuyo pinaagi sa unod; kana mao, pinaago sa normal nga tawhanong kusog, dili pinaago sa Balaang Espiritu. Ug ang kinadak-an nga trahedya mao nga siya wala mipili sa pagdawat sa dayong kinabuhi (Roma 8:9).

Si Pablo nagwali ngadto sa mga unodnong katawhan ingon nga "kaigsuonan," diin nagapakita nga sila mga sakop sa iglesia. Dili siya makatawag kanila nga "espiritohanon" kay sila wala gayud mabobo sa Balaang Espiritu. Wala sila nagtubo diha sa pagtoo sigon sila kinahanglan magtubo. Poseble kini nga mamahimong usa ka sakop sa iglesia sulod sa daghang katuigan ug sa gihapon mamahimong usa ka unodnon nga Cristohanon. Poseble kini sa pagbaton og kahibalo sa biblia ug sa higapon dili hamtung nga espiritohanon. Daghang mga unodnong Cristohanon mibati nga walay katagbawan, kasagmuyo, o kakulangan sa katuyoan diha sa ilang mga espiritohanong kinabuhi. Pipila mga walay kadasig ug nagingon, "Kami makasasala man. Wala kami mahimo niini."

Ang uban nga unodnon nga mga Cristohanon maoy mga masiboton ug dasig, tingali garboso sa ilang mga mahinungdanon nga katungdan sa iglesia. Makasusubo, si Jesus nagingon, "Daghan ang moingon Kankoa nianang adlaw, 'Ginoo, Ginoo, wala ba kami nagpanagna sa Imong ngalan, nanagpagula og mga yaw sa Imong ngalan, ug nanagbuhat og daghang kahibulongan sa Imong ngalan?' Ug unya Ako magaingon kanila, 'Wala Ako makaila kaninyo; pahawa kamo gikan Kanako, kamong mga nanagbansay og pagkadaotan!'" (mateo 7:22,23). Unsa ang problema? Wala silay personal nga relasyon kang Jesus ug walay buhing kadugtongan sa Balaang Espiritu.

Kon makaplagan nimo nga ikaw usa ka unodnon nga Cristohanon niinig gutloa, pagdasig! Ikaw adunay posibilidad sa bag-ong kinabuhi gunad karon. Daghang unodnon nga mga Cristohanon anaa niini nga kahimtang nga walay kalibutan, ug mahimong ikaw nagaampo na alang sa usa ka mas lalum nga kasinatian sa pagtoo. Si Jesus nagatinguha, "nga mapuno ang inyong pagmaya" (Juan 15:11), ug Siya nagadapit kanimo sa pagpahulay diha sa sumpok nga paglaum sa dayong kinabuhi.

Pag-ampo sa Pulong sa Dios

Kami sa Gihapon unodnon, apan may paglaum.

"Apan ako, mga igsoon, dili makahimo sa pagsulti kaninyo ingon sa paagi sa pagsulti ko ngadto sa mga tawo nga espiritohanon, kondili sa mga tawong kalibutanon, sa mga masusu pa diha kang Cristo. Gibuhi ko kamog gatas, dili sa magahi nga kalan-on; kay kamo dili pa andam niini; ug bisan gani karon, kamo dili pa man andam, sanglit kamo kalibutanon pa man gihapon. Kay samtang anaa pa kaninyo ang kasina ug ang panaglalisay, dili ba kalibutanon kamo ug nanaggawi ingon nga mga tawo nga lawasnon? " (1 Corinto 3:1-3).

Minahal nga Ginoo, salamat sa paglakip "sa higapon" niini nga teksto, kay kini nagapahinumdom kanamo nga kami dili kinahanglan magpabilin niini nga kahimtang. Gusto namo nga Ikaw mag-usab kanamo karon. Salamat nga ang kasina, kagul-anan, ug mga pagkabahin-bahin maayo sa dihang kami magpuyo diha sa Balaang Espiritu.

Kami nagapangayo ba sa unodnon nga mga katuyoan?

"Kamo wala managpakabaton tungod kay kamo wala man mangamuyo. Kamo nagapangayog mga butang apan dili managpakadawat niini tungod kay dinautan man ang inyong pagpangamuyo, aron lamang gastohon kini sa pagtagbaw sa inyong mga pangibog " (Santiago 4:2, 3, NIV).

Amahan, kami nagapuyo diha sa espiritohanon nga kakabus tungod kami wala mangayo, o nangayo uban sa hinakog, tinawhanong katuyoan. Usba intawon ang among mga pag-ampo ug giyahi kami pinaagi sa Balaang Espiritu.

Dugang nga mga Sugyot sa Pag-ampo

Mga Pasalamat ug Pagdayeg: Paghatag og mga pasalamat alang sa mga tino nga panalangin ug dayga ang Dios tungod sa Iyang pagkamaayo.

Kompisal: Paggahin og pipila ka mga minutos alang sa pribado nga kompisal ug pasalamat ang Dios tungod sa Iyang pagpasaylo.

Giya: Hangyoo ang Dios sa paghatag og kaalam alang sa mga hagit karon ug mga desisyon.

Atong Iglesia: Hangyoo ang Dios sa pagpanalangin sa mga panginkamot sa atong iglesia sa lokal, rehiyon, ug sa tibuok kalibutan.

Mga Lokal nga Hangyo: Iampo ang mga panginahanglanon karon sa mga sakop sa iglesia, panimalay, ug mga silingan.

Pamati ug Responde: Paggahin og panahon sa pagpamati alang sa tingog sa Dios ug sa pagresponde diha sa pagdayeg ug awit.

Mga Sugyot nga Awit

SDA Hymnal: Amazing Grace (#108); Blessed Assurance (#462); Whiter Than Snow (#318); Redeemed (#337); The Savior is Waiting (#289). *Other Songs:* Change My Heart, O God; Unto Thee, O Lord; I've Been Redeemed.